

Каноны о усопших восьми гласов

Начало канона, общее для всех заупокойных канонов.

Канон, глас 1-й,
егоже краегранесие:
«Верую усопшим первую песнь приношаю»

Песнь 1

Ирмос: Твоя победительная десница боголепно в крепости прославися: та бо, Безсмертне, яко всемогущая, противныя сотре, израильтяном путь глубины новосоделавшая.

Припев: Дивен Бог во святых Своих, Бог Израилев (поклон).

Врата смерти и вереи, Твоею смертью сокрушил еси, Безсмертне, врата отверзи Владыко, паче ума, безсмертия усопшим, молитвами страстотерпец Твоих.

Покой, Господи, души усопших раб Твоих (поклон)¹.

Да Божественного живота сподобимся, сошел еси к смерти, тоя же испроверг сокроища, нас оттуду извлекл еси: ныне же, Жизнодавче, преставленныя упокой.

Слава: Ты мое тленное же и мертвенное восприим, в нетление облекл еси, и к безконечному житию и блаженному вознесл еси, идеже яко щедр, ихже приял еси, упокой.

И ныне: Рождшую еже от Бога Божие Слово, вернии, воспоим: Та бо, Всечистая, путь жизни умершим бысть, Юже, яко Богоприемницу и Богородицу прославим.

Песнь 3

Ирмос: Едине, ведый человеческого существа немощь и милостивно в не вообрази, препояши мя с высоты силою, еже вопити Тебе, Святый, одушевленный храме неизреченныя славы Твоя, Человеколюбче.

Дивен Бог во святых Своих, Бог Израилев.

Яко един благ сый, яко един многомилостив, яже благочестно к Тебе отшедшия, в небесных селениях упокой, идеже неизреченная радость и наслаждение и идеже собор мученический веселится.

Покой, Господи, души усопших раб Твоих.

Ты един явился еси на земли, Спасе мой, безгрешен, иже грехи мира вземляй яко милосерд; от мира сего преставльшихся верую души

¹ В 1-й и 9-й песнях припевы читаются с поклоном, в остальных – без поклона

упокоем во дворех святых Твоих, в сладости райстей Человеколюбче.

Слава: Смерти державу низлож, живот нескончаемый всем верным источил еси, Владыко: в том убо учини благочестно отшедшия, презирая безмерная прегрешения и прощая грехи их, Человеколюбче.

И ныне: Без семени зачат, Чистая, Слово присносущное, плотски к нам пришедшее, и смерти крепость разорившее, и мертвым воскресение и жизнь вечную Своим милосердием дарующее.

Господи, помилуй (*трижды*).

Седален, глас 6-й

Воистинну суета всяческая, житие же сень и соние, ибо все мятется всяк земнородный, якоже рече Писание: егда мир приобретаем, тогда во гроб вселимся, идеже вкупе царие и нищии. Темже, Христе Боже, преставльшихся упокой, яко человеколюбец.

Слава и ныне, Богородичен: Всесвятая Богородице, во время живота моего не остави мене, человеческому предстательству не ввери мя, но Сама заступи и помилуй мя.

Песнь 4

Ирмос: Гору Тя, благодатию Божиею приосененную, прозорливыма Аввакум усмотрив очима, из Тебе изыти Израилеву провозглашаше Святому во спасение наше и обновление.

Дивен Бог во святых Своих, Бог Израилев.

Умертвив ад непобедимую Твоею силою, вменен был еси в мертвых, един сый свободь, Христе, души свободи благочестивых, и еже в нем осуждения, святых мученик мольбами.

Покой, Господи, души усопших раб Твоих.

Иже всех сый яко Владыка, противодостойную иже от Адама Твоего зачатия избаву дал еси нам и цену¹; темже молимся Твоим щедротам, преставльшихся упокой, согрешений подавая оставление.

Слава: Приял еси, Спасе мой, еже во гробе положение и яже во гробех жити осужденныя мертвецы, яко Бог, воскресил еси. Ныне же жизни присносущныя сподоби преставленныя, яко един Человеколюбец.

И ныне: Спасеся род человеческий Рождеством Твоим, Ты бо родила еси нам ипостасный Живот, смерти потребление и к жизни соделовающий восход, Богородительнице Пренепорочная, Владычице.

Песнь 5

Ирмос: Просветивый сиянием пришествия Твоего, Христе, и осветивый Крестом

¹ Противодостойную – достойную чего-либо в сравнении с другим; зачатие (заколание) – жертва; избава – здесь, цена выкупаемого пленника.

Смысл этого предложения следующий: как Владыка всех, (Господи,) Ты дал выкуп за тех, которые произошли от Адама (то есть за людей, за падшее человеческое естество) – цену Твоей (Крестной) Жертвы.

Твоим мира концы, сердца просвети светом Твоего Богоразумия православно поющих Тя.

Дивен Бог во святых Своих, Бог Израилев.

Исцеляяй от ада смертнаго, смерть прият и смерти жало притупил еси; но Сам упокой, ихже приял еси, Жизнодавче, мученик мольбами.

Покой, Господи, души усопших раб Твоих.

Умерщвления и тления человеки свободивый, души верно преставленных учини во дворех святых Твоих, отнюдуже отбеже всяка скорбь, и веселие водворяется.

Слава: Рай убо с Тобою повешенному яко отверзл еси; ныне приими, души Владыко, к Тебе верою преставльшиися, подая им в Церкви первенец водворитися.

И ныне: Избавляющи на Тя надежды державу имущих, к пристанищу Божественныя воли тихо настави, матерним Твоим дерзновением к Сыну Твоему, Благословенная Всенепорочная.

Песнь 6

Ирмос: Обыде нас последняя бездна, несть избавляяй, вменихомся, яко овцы закления, спаси люди Твоя, Боже наш, Ты бо крепость немощствующих и исправление.

Дивен Бог во святых Своих, Бог Израилев.

Яко милосерд, преставленным даруй прегрешений прощение, и вечное наслаждение подая, идеже сияет лица Твоего светлость, и озаряет страстотерпцы Твоя.

Покой, Господи, души усопших раб Твоих.

Иже кровию, от ребр Твоих истекшею, мир искупил еси, верою усопшия убо, Христе, избави честными Страстьми Твоими, Ты бо цену за всех Себе дал еси.

Покой, Господи, души усопших раб Твоих.

Иже создавый мя рукама пречистыма первее и дух даровавый, и, к земли низпадша зле, паки обновивый краснейше, ныне души преставльшихся Сам упокой.

Слава: Чертогу Твоему светоносному, Господи, вселити сподоби, яже в вере к Тебе усопшия, тех презирая прегрешения, яко благ и милосерд и многомилостив.

И ныне: Поем Тя, Благословенная Чистая, Еяже ради нам возсия, сущим во тьме и сени смертной, правды незаходимое Солнце, Ты бо нашего спасения ходатаица была еси.

Господи, помилуй (*трижды*). Слава и ныне.

Кондак, глас 8-й

Со святыми упокой, Христе, души раб Твоих, идеже несть болезнь, ни печаль, ни воздыхание, но жизнь безконечная.

Икос

Сам един еси Безсмертный, сотворивый и создавый человека; земнии убо от земли создахомся и в землю туюжде пойдем, якоже повелел еси создавый мя и рекий ми: яко земля еси и в землю отыдеши, аможе вси человецы пойдем, надгробное рыдание творяще песнь: аллилуия, аллилуия, аллилуия.

Песнь 7

Ирмос: Тебе умную, Богородице, пещь, рассмотрим, вернии, якоже бо отроки спасе три Превозносимый, мир обнови, во чреве Твоем всецел, хвальный отцев Бог и препрославлен.

Дивен Бог во святых Своих, Бог Израилев.

Сиянии Пречистыя славы Твоея озаритися, Христе, подавай, от бури мирския к Тебе отшедшим, и тех сподоби с мученики взывати Тебе: хвалимый отцев Боже, благословен еси.

Покой, Господи, души усопших раб Твоих.

Нов Адам воистинну быв, Адамов Содетелю, Иже клятву бо Адамову един потребил еси. Темже молимся Тебе: преставленныя упокой в сладости райстей, Христе, яко един милосерд.

Слава: Иже нашу естественную немощь един сведый, яко Бог, благ же и милостив, вся, ихже преставил еси, идеже свет незаходимый присещает лица Твоего, учини, Христе, хвалимый отцев Боже и препрославлен.

И ныне: Закона сени¹ и древняя гадания Твоим преидоша Рождеством, Богомати, Ты бо нам Божественныя благодати Свет возсияла еси, имже древних избавихомся долгов, Чистая, воспевающе Бога препрославленного.

Песнь 8

Ирмос: В пещи отроцы Израилевы, якоже в горниле, добротою благочестия чистее злата блещахуся, глаголюще: благословите, вся дела Господня, Господа, пойте и превозносите во вся веки.

Дивен Бог во святых Своих, Бог Израилев.

Скверну всю Твоих рабов усопших, Твоего человеколюбия росую отмыв, Тя песнями воспевати сподоби: благословите, вся дела Господня, Господа, пойте и превозносите Его во вся веки.

Покой, Господи, души усопших раб Твоих.

Предстоятели, Спасе, десныя верою оправдав молитвами

¹ Сень – тень, мрак; закона сени – Ветхий завет, служивший прообразом Нового благодатного завета.

страстотерпцев, яже преставил еси верныя, покажи поющия: благословите, вся дела Господня, Господа, пойте и превозносите Его во вся веки.

Слава: Иже смерти и живота имеяй всякую власть, яже верою усопших Твоего сияния улучшить благоволи, взывающия: благословите, вся дела Господня, Господа, пойте и превозносите Его во веки.

И ныне: Спасения ходатаица нам была еси, Всенепорочная, и в непреходимыя веки пребывания же и светлости: Тебе, Дево Чистая, присно, вся дела, благословим и превозносим во вся веки.

Песнь 9

Ирмос: Образ чистаго Рождества Твоего огнепалимая купина показа неопальная; и ныне на нас напастей свирепеющую угасити молимся печь, да Тя, Богородице, непрестанно величаем.

Дивен Бог во святых Своих, Бог Израилев.

Пощади, яко Бог человеколюбив и милостив, Твое создание и упокой в селениях святых Твоих, идеже мученицы вси веселятся, верою преставленыя от временных, Многомилостиве.

Покой, Господи, души усопших раб Твоих.

Имеяй милостей бездну, препобеждающую рабов Твоих прегрешения, ихже, прием, избра, упокой в недрах Авраамлих, Человеколюбче, и с Лазарем во свет Твой всели.

Слава: Избавитель и Спас быв роду человеческого, распятия ради, яже ныне от нас преставил еси, яко благодатель, наслаждения Божественнаго сподоби, и живота нетленного, и веселия, и светлости.

И ныне: О, яже паче ума чудес Твоих! Ты бо, Дево, едина всем, иже под солнцем, подала еси разумети новейшее чудо, Пречистая, Твоего рождества недоуменнаго: темже Тя вси величаем.

Достойно есть яко воистинну блажити Тя, Богородицу, присноблаженную и пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем (*поклон*).

Окончание канона, общее для всех заупокойных канонов.